

M009: Pfaffe Lambrecht: 'Alexanderlied' (V ['Vorauer Alexander'])

0,1 Diz lit daz wir hi wurchen .
0,2 daz sult ir rehte merchen .
0,3 sin geuuoge ist uil reht .
0,4 iz tihte der phaffe lambret .
0,5 er tate uns gerne ze mare .
0,6 wer alexander ware .
0,7 alexander was ein wise man .
0,8 uil manec riche er gewan .
0,9 er zestorte uil manec lant .
0,10 philippus was sin uater genant .
0,11 Diz mugit ir wol horen .
0,12 in libro machabeorum .
0,13 alberich uon bisinzo .
0,14 der brahte uns diz lit zuo .
0,15 er het ez in walhischen getihtet .
0,16 nu sol ich es euh in duotischen berihten .
0,17 niman in schulde sin mich .
0,18 louc er so levge ich .
0,19 Do alberich diz lit insluoc .
0,20 do het er ein salemones puoch .
0,21 da er ane sach .
0,22 uanitatu- uanitas .
0,23 daz ist allez ein itelcheit .
0,24 daz diu sunne umbegeit .
0,25 daz hete salemon wol uirsuht .
0,26 dar umbe suar in sin mut .
0,27 er ne wolte niht langer ledec sitzen .
0,28 er screip uon grozen witzen .
0,29 wande des mannes muozecheit .
0,30 ze dem libe noh ze der sele niht uersteit .
0,31 dar ane gedahte alberich .
0,32 den selben gedanc han ich .
0,33 unt ich ne wil mich niwit langer sparen .
0,34 des liedis wil ich uoluarn .
0,35 Dicher chunege was genuc .
0,36 daz ne saget uns nehein puch .

0,37 noh neheiner slahte mare .
0,38 daz deheiner so riche ware .
0,39 der in alten ziten .
0,40 mit sturme oder mit strite .
0,41 i so manec lant gewunne .
0,42 oder so manegin kunic bedvunge
0,43 herzogen irsluoge
0,44 un- andern uursten genuoge .
0,45 so der wunderliche alexander .
0,46 im ne gelichet nehein ander .
0,47 Der uon crhichen was geborn .
0,48 unde wart da ze einem kunige irchron .
0,49 unde was der allererste man .
0,50 den i crhihlant ze chunege gewan .
0,51 iz waren ovh chunege creftic .
0,52 uber manec dit gewaltic .
0,53 uil michel was ir salicheit .
0,54 ir list unde ir kundecheit
0,55 ir scaz der was uil groz .
0,56 der ne wart ni nehenier sin genoz .
0,57 der mit listen oder mit mahten .
0,58 sinen willen i so uolbrahte .
0,59 so der selbe . man .
0,60 umbe den ich is began .
0,61 Diser rede wil ich mich iruaren .
0,62 salemon der was uoz getan .
0,63 der sich uz allen kunegen nam .
0,64 do diu frowe regina austri zu im kom .
0,65 unde si sinen hof gesach .
0,66 mit rehter warheit si sprah .
0,67 daz uon mannes geburte .
0,68 ni so frumer kunic wurte .
0,69 man muste in wol uz sceiden .
0,70 wande alexander was ein heiden .
0,71 Nu sprechent bose lugenare .
0,72 daz er eines govkelares sun ware .
0,73 di ez imer gesagent .
0,74 di liegent also bose zagen .
0,75 oder di es i gedahten .
0,76 er was rehter cheiser slahte .
0,77 nimer geloube ez nehein frum man .
0,78 sinen uater ich wol genennen kan .
0,79 sin geslahte daz was herlich
0,80 ubir al crhichen was er gewaltic .
0,81 philippus hiz der uater sin .
0,82 al macedonen lant was sin .
0,83 sin ane was ein gut kneht
0,84 uber al daz mer gi sin reht .

0,85 er truc eine tugentliche maht .
0,86 a wi wi manic uolcwic er uaht .
0,87 wider den kunic eren .
0,88 harte ellenthafte uberwant er den .
0,89 Philippus nam im ein wip .
0,90 si truc einen frumeclichen lip .
0,91 ich sage ev wi ir name was .
0,92 si hiz div scone olimpias .
0,93 das was alexanders muter .
0,94 diu frowe hete einen bruder .
0,95 der was ouh alexander genant .
0,96 ze perse het er daz lant .
0,97 der was ein uurste also getan .
0,98 er ne wolte neheinem kunige wesen undertan .
0,99 er ne wolte ovh ni . uz neheineme sturme geflihen .
0,100 sui im sinev dinc da irgingen .
0,101 er was ein tuerlich degen .
0,102 unde wolde ouch rehter herscefte phlegen .
0,103 Nu wil ich eu uon alexanderes sagen geburte .
0,104 wi si alhi zu wurte .
0,105 sin muter frow olimpias .
0,106 ze den stunden do siv sin genas .
0,107 do wart ir ein uil michel nohtfal .
0,108 div erde erbibete uberal .
0,109 da was der doner uil groz .
0,110 a wie starche daz weter ane goz .
0,111 der himel der wandelohte sich .
0,112 unt der sunne uerdunchlote sich .
0,113 er hete uil nach sinen schimen uerlorn .
0,114 do alexander wart geborn .
0,115 Nu ne fressiht ich e noh sint .
0,116 alsus geborn nehain chint .
0,117 glov-beht mir des ich iv sage .
0,118 der dech baz in drin tagen .
0,119 dan al ander chint .
0,120 so si drier manoht alt sint .
0,121 unt also im ieht gescach .
0,122 daz imme ubel ze horen was .
0,123 so sah er also der wolf teoht .
0,124 so er obe sineme ezzen stet .
0,125 daz ich iv uon ime sage daz ist war .
0,126 strub unde roht . was ime sin har .
0,127 nah eineme uiske getan
0,128 den man in dem mere mach uahen .
0,129 ez was ime ze mazen dicke .
0,130 grispe also leven loche .
0,131 umbe sin gesune wil ich ivch bereiten .
0,132 ein ovge das was weithin .

0,133 getan nach eineme drachen .
0,134 daz chom uon den sachen .
0,135 do in sin muoter bestunt ze tragene
0,136 do chomen ir freslich pilide zegegene .
0,137 daz was ein uil michel wunder
0,138 svvarz was ime daz ander .
0,139 nach eineme grifen getan
0,140 alsus sagent die in ie gesahen .
0,141 Sin hals was ime wol gescafen .
0,142 sin brust was ime wol offen .
0,143 sin arme warin ime uone grozer maht .
0,144 alles sines mutes was er wol bedaht .
0,145 sin buch ni was ime ze lanc noh ze breiht .
0,146 a wie wole dem ivngelinge daz stet .
0,147 scone er ze tale wert scein
0,148 peidu uber fuoz . unt uber pein .
0,149 unt uber allen sinen lip .
0,150 so was er als erilc .
0,151 daz sag ich iv ze ware .
0,152 in sinem erstem iare .
0,153 so wols ime maht unt sin .
0,154 mere den ainem andren in drin .
0,155 Nu uernemht wie sich alexander uur nam
0,156 swa so ein frumich riter zuoz im chom .
0,157 dem bot er lip unt guot .
0,158 er ne cherte cheinen sinen muot
0,159 weder an chint noch an tumben man .
0,160 a wie wol de- heren daz gezam .
0,161 ime was ouch sin gebare .
0,162 als er ein furste uon allen landen ware .
0,163 Die meister die alexander ouch gewan .
0,164 si waren wol gerehte man .
0,165 si begunden in wisheit leren .
0,166 unt zugen in zuo grozen eren .
0,167 si lertin in sturm unde uolcquvic .
0,168 so des nie wart gelich .
0,169 der liste der er dannen gewan .
0,170 des wart er ein frummer man .
0,171 Der erste meister sin .
0,172 der lert in crheichissen unde latin .
0,173 unt puchstabe sezzen an eineme perment .
0,174 noch tuo was er ein luzel chint .
0,175 unt lert in uil manich puch .
0,176 und ander wisheit genuoch .
0,177 Der ander meister den er gewan .
0,178 der lert in wol musicam .
0,179 unt lert in seitin ziehen .
0,180 daz alle thoni dar in giengen .

0,181 rohten unt ouch der liren chlanc .
0,182 unt uon ime selben heuen daz gesanc .
0,183 Der drihte frumt ime harte wol .
0,184 er lert in alle wisseheit .
0,185 wie uerre der sunne uon der manin geht .
0,186 unt lert in ouch den list .
0,187 wie hoch uon dem wazer z em himele ist .
0,188 Der uierde meitesr den er gewan .
0,189 daz was aristotiles der wise man .
0,190 er lert in al die chundicheit .
0,191 wie der himel umbe geht
0,192 unt stach ime die liste in sinen gedanc .
0,193 z erchennen daz gestirne unt ouch sinnen ganc .
0,194 da sich die uergen mit pewarent .
0,195 da si in dem tieffen mere varnt .
0,196 Ein meister gewan sint .
0,197 alexander daz edele chint .
0,198 der lert in mit gewauen faren .
0,199 unt wie er sich mit eineme silte solte bewarn .
0,200 unt wie er sin spere solte tragen .
0,201 ze dem dem er wolte scaden .
0,202 unt wie er den erchiesen mahti
0,203 unt gestechen so daz tohte .
0,204 unt also der stich werde getan .
0,205 so lert e n zuo dem sverte uahen .
0,206 unt da mit chundiclichen slahen .
0,207 unt lert in wie er sich solte bewarn .
0,208 uor deme der ime wolde scaden .
0,209 unt wie er sinen fiant lagen solte .
0,210 die er da dwingen wolte .
0,211 unt wie er z en riter solti gebarn .
0,212 umbe daz daz s im willich waren .
0,213 Der erste bestunt in mit wizzen .
0,214 unt lert in ze dinge sizzen .
0,215 unt lert in wie er daz bedahte
0,216 daz er uon deme unrehti bescheiede daz rehte .
0,217 unt wie er lantreth bescheiden chunde .
0,218 allen den es er guonde .
0,219 Umbe diz unt umbe manehc ander .
0,220 alsus wart daz chint alexander
0,221 beide listihc unt geweltich unt balt
0,222 do alrest was er zuvelf iar alt
0,223 also staetich was ime sin muot .
0,224 umbe al wertlich guot .
0,225 so wolt er ni nicht geliegen .
0,226 noch sich fone cheiner wareht gezien
0,227 a wie wol einem sinem meister daz erschain .
0,228 er stiz in ze tal vbir einem stein .

0,229 daz ime sin hals nezwei brast .
0,230 wande er im ain luge zuo sprach .
0,231 nu sprechent bose lugenare
0,232 daz der sin uater ware .
0,233 a wie ubele ich daz geluoben mach
0,234 wand r im sin hals enzwei brach .
0,235 Von philippus stuode wil ich iv sagen .
0,236 dar under wart ein ros getragen .
0,237 daz was wunderlich .
0,238 iz was irre unt stritich .
0,239 snel unt ernsthaft .
0,240 fon siner gesepte ioch uon siner chraft .
0,241 der munt was im als einem esele getan .
0,242 sin oren warin im uil lanc .
0,243 daz hovbet mager unt swanc .
0,244 sin ovgen war im al der uare .
0,245 als eim fligenten arn .
0,246 sin hals was im lochot .
0,247 ich wane ez were levven geslaechte .
0,248 uf den goffen habt iz rinderhar .
0,249 an sinen siten liebarstes mal .
0,250 so sarrizin noch christenman .
0,251 nichein pezzar ros gewan .
0,252 Daz ros wart mit iseren gebunten .
0,253 also daz da tobeht ze allen stunden .
0,254 unt wart fur den chunich philippus geleit .
0,255 unt als er uerna- sin gelegenhait .
0,256 buziual hiez er z namen .
0,257 daz tuhte siv guot allesamt .
0,258 Man hiez daz ros in einen marstat thuon .
0,259 daz si da fuor maechten geruoun .
0,260 zuo dem ros getorste niemen gen
0,261 wan umbe den ez also was getan .
0,262 den uerteileht was daz leben .
0,263 den muose man dem rosse geben .
0,264 Dem chunige wart ein bote gesanht .
0,265 uon dem den daz ros was chunt .
0,266 unt hiez ez paz pewaren .
0,267 er sprach man solte ez noch an im eruaren .
0,268 wem des chuniges gewalt
0,269 nach sinem libe wurt fersalt .
0,270 er sprach "daz sol dem . der z alrest bescride .
0,271 wan diz nie chein man ne gerihte ."
0,272 Unt als alexander haim chom .
0,273 algerihte er daz uernam .
0,274 wis was er z ummazen .
0,275 tuo alrest het er sinen meister uerlazen .
0,276 des umbe daz ros was geseit .

0,277 des inhabt er noh tuo uernomen nicht .
0,278 Eines tages als er uffen der palenze geht .
0,279 geste habt in dar gelaicht .
0,280 do hord er z ros waien .
0,281 daz stunt in siner thobeiht scrien .
0,282 alexander sprach ze n chunden .
0,283 die mit ime uber die palize gingen .
0,284 "ich ne weiz waz mir scillet in z ore .
0,285 ez ne lat mich nicht gehoren .
0,286 ich ne weiz weder z ein ros oder ein lewe deoht .
0,287 wain ez da in beslozzen stet ."
0,288 Btholomeus sprach zuo dem chinde .
0,289 "herre ist buziual ein ros uil swinde .
0,290 daz hat iuwer uater in getan .
0,291 under der stuot ne mothe neichn bezzer gegen ."
0,292 er sprach herre ez ne hat nehein marslach in huote .
0,293 wande ez erbizet ubele unt guote .
0,294 Unt diz alexander uernam .
0,295 niwht er ne beite . e er zu dem rosse chom .
0,296 er reif den chinden .
0,297 unt heiz im den sluzel gewinnen .
0,298 ir neheiner getorste daz ros da fur ziehen .
0,299 want sie alle uil ungerne dar in gigen .
0,300 alexander erzurneht daz .
0,301 die tur er nider brach .
0,302 er hiz sie alle abe stan .
0,303 er wolte aleine dar in gan .
0,304 Also buziual gegen im uz wolte varn .
0,305 unt ez alexander ane begunde starn .
0,306 ez erbluote sich aller siner maht .
0,307 unt wolte im wesen dienesthaft .
0,308 ez chnite fuor im dar nider .
0,309 ez ne geruorthe sich ouch nimer sider .
0,310 also chundeclich was dem rosse al sin gebar
0,311 als ez des chindes wol gewone ware .
0,312 Alexander begunde do streihen .
0,313 ein ros daz nie nichein man begunde weichen .
0,314 so der nie seil noch zom ane chom .
0,315 mit der mane er z nam .
0,316 er habet ellenthaften gedanc .
0,317 ufen sinen rucke er ime spranc .
0,318 uzer deme gademe er z reiht .
0,319 daz was ein michel paltheit .
0,320 Ein pote ilte dem chunge daz sagen .
0,321 er ne getorste er nicht uergen .
0,322 waz sin sun hete getan .
0,323 uf spranc der chunich sa .
0,324 unt zoh sines sinnes .

0,325 do fruot er sich sines chindes .
0,326 unt also alexander daz uernam .
0,327 er thet als im wol gezam .
0,328 er warf sich nider
0,329 unde giench sineme uater gegene .
0,330 unt also si zesamene chomen .
0,331 mit handen si sich namen .
0,332 ir rede was uil minnesam .
0,333 als ir hie muot ferstan .
0,334 "heil dich" sprach phillippus "sun min .
0,335 mich tuncet do solt chunich sin .
0,336 der gewalt . si dir uil gereiht .
0,337 also wit so min rich geht ."
0,338 "helt iuch" sprach alexander "fater min ."
0,339 got laz ivch iemer salich sin .
0,340 alles guotes ich iv uil wol getruwe .
0,341 uil lange muzet ir iuwer riche mit genaden bewen .
0,342 Er chot "fater nu bin ich funzen iar alt .
0,343 daz haben ich rehte gezalt .
0,344 unt bin also chomen ze minen tagen .
0,345 daz ich wole wafen mach tragen .
0,346 unt swer eigen tugent iemer sol gewinnen .
0,347 der sal sin in siner iugende beginnen .
0,348 unt e seh er sich sculdich
0,349 nieuht uersum er sich ."
0,350 der chunich er ne wolte es neuht beiten .
0,351 er hiz daz chint bereiten .
0,352 waz mage ich iu sundere gesagen
0,353 er det im wafen fur tragen .
0,354 so man s unter eines chuniges gesinden .
0,355 allerbezzest chunde finden .
0,356 unt widerchur s alexander .
0,357 man gewun im ein ander .
0,358 Unt also daz chint nach dem site .
0,359 was wol gewafen unt geriten .
0,360 do was er ein sconer iungelinc .
0,361 si gruozt in als ein chunich
0,362 er sprach wa si des gedathen .
0,363 daz s im eins chuniges namen an leiten .
0,364 al die wil als er so uil chunicriches nivht hete .
0,365 da er sinen uinger uf geleite .
0,366 Er sprach "woldet ir eine wile geruowen
0,367 unze ich aine tugent . maht getuon .
0,368 an einem chunige wil ich es beginnen .
0,369 unt mach ich den uberwinden .
0,370 daz ich dem die chroni abe ziehe .
0,371 unt uz dem uelde tuon geflihen .
0,372 so muget ir mir chuniges namen geben .

0,373 also lange so ich iemer gelebe ."
0,374 Ein chunich was nycolaus genant .
0,375 alexander fur in sin lant .
0,376 cesaream fur die grozen stat .
0,377 da wart der richc chunich ensaht .
0,378 alexander faht ime den sige habe .
0,379 er fuorte die corone mit im dane .
0,380 unt als er do wider haim gesan
0,381 ein laiht nuemare er im uernam .
0,382 sin fater habeht sich siner muoter gelovbet .
0,383 unt saz in foller brutlofe .
0,384 er liz die sine muoter
0,385 die frovwen div hiez cleopatra .
0,386 Also alexander haim chom .
0,387 er geinch fur sinen fater sten .
0,388 unt nam die corone die er mitsamt ime da hete .
0,389 sinem fater er s uf sazthe .
0,390 Er sprach "fater nement tiz mit minnen .
0,391 daz ich mit sturme han gewonnen .
0,392 unze ich es baz mahc getuon .
0,393 des habet ir ere untde ruom .
0,394 wan eines tinges trag ich ivch ubelen muot .
0,395 daz tunchet mich ze neuht guot .
0,396 daz ir mine muoter liezet ivwers willen .
0,397 unt habet ein uberhuor gestellet .
0,398 ter rede will ich nu gedagen .
0,399 iuer ezzen will ich neuht fersagen .
0,400 nu wevn so mir dei ovgen da ich mit kesihe .
0,401 ich kedanche sin allen den hie n .
0,402 die disen rah habent gefrumit .
0,403 daz er niemer z eren chumt ."
0,404 Ein riter hiez lisias .
0,405 der stolz unt redehaft was .
0,406 dem was daz uil ungemach .
0,407 daz daz chint so uerre sprach .
0,408 unt antwurt im ein smaheit .
0,409 also diche der stolze man tuoht .
0,410 do hete der chunich einen naff swaren .
0,411 da an stuonden guldine plalhemale .
0,412 den habet alexander uf der hende .
0,413 unt slug en lisian fur die zende .
0,414 daz s im in sine chelen risin .
0,415 er sprach "la du din rede wesen ."
0,416 Der chunich uf fon der taueln sprach .
0,417 wande in sin zorn twanc .
0,418 wan im der strit niveht wol geuiel .
0,419 do trat er uor unde uiel .
0,420 daz im sin schenel zebrast .

0,421 unt daz er ane tugent lahc .
0,422 unt also der chunich der nider uel .
0,423 alexander sin bluot wiel .
0,424 sin zorn in der zuo truoch .
0,425 daz er mit tem swerte her umbe sluch .
0,426 unt swer da wider wolte stan .
0,427 der ne mohte im mit dem leben nieht engan .
0,428 ich ne freiste nie den der fername
0,429 war div brut ie bechome .
0,430 alexander gemazet sich es tuo .
0,431 unt giench sinem fater zuo .
0,432 unt tehte im hail sin bain .
0,433 unt brat in unt sine muter n ein .
0,434 Unde also daz was gendet .
0,435 do wart ein bote gesendet .
0,436 unt sagete philippus daz .
0,437 daz er beware- hize baz .
0,438 sine burch z antonia .
0,439 unt fure dar mit her
0,440 unt name die burch in sine gewalt .
0,441 da waren die rede manechfalt .
0,442 ez ware der sezmanne wille .
0,443 daz reiten sie under in stille .
0,444 wie si sich fon ime gezugen .
0,445 unt in lasterliche betrugten .
0,446 unt si sich an dem besahte .
0,447 der die burch for in behate .
0,448 Unde also der chunich diz fernam .
0,449 harte sere er sin erchom .
0,450 er wolt es niht langer biten .
0,451 den sun hiz er dar riten .
0,452 alexander sich besante .
0,453 wie stolzliche er dar ranhte .
0,454 helde folk gie im nah .
0,455 fuonf wesr zehinzoch .
0,456 einen sturm teht er mit listen .
0,457 unt gewan die selben ueste .
0,458 fil froliche er widere ze lante chom .
0,459 daz er neheinen scaden hethe genomen .
0,460 Nv uernement waz ich iv hie zele .
0,461 fuor dem chunige in dem sale .
0,462 da uant er boten darios
0,463 aines geweltigen chuniges .
0,464 der den scins uon sinem fater philippus wold enfanen .
0,465 wand er dario was undertan .
0,466 diz was darios . ter in danigel stet .
0,467 der mit dem chriechissen chunige streht .
0,468 diz was den daniel slafinde gesach .

0,469 in einem trovme da er lach .
0,470 da sah er fehten ainen boc unt ainen wider .
0,471 daz bezench die zwene chunige sider .
0,472 daz philippus den zins galt .
0,473 in darios gewalt .
0,474 dannen uber manegen tach .
0,475 daz was tem sune ungemach .
0,476 darius er wart umbe den selben zins erslagen .
0,477 daz ich iv zal ware sagen .
0,478 Alexander spranc uf algeriht .
0,479 zuo der boten gesiht
0,480 des zinses er newht galt .
0,481 ir heren er boslich scalt
0,482 er sprach "iuwer herre ne hat anderes neheine frumicheit .
0,483 wan daz er scaz uber einander laeiht .
0,484 er was ein harte tumb man .
0,485 daz er zinses an uns gesan .
0,486 er ne wirt ime niemer gesant .
0,487 hinnen uzer chriechlant .
0,488 bi minen ziten"
0,489 die boten hiz er riten .
0,490 e si ersturben an der stund
0,491 daz si sh ir herren taten chunt .
0,492 also lange so er des zinses neweht wolten enbern .
0,493 er solt in sin da haime wern .
0,494 mit also getaner maze .
0,495 er solte ime sin hovbeht lazen .
0,496 diz inbot er ime also .
0,497 des waren die boten riwrich unt fro .
0,498 si warn uil fro das si des libes genasen .
0,499 unt waren harte riwrich daz er ir herren wolte uerdvvasen .
0,500 Unde also diz wart gendet .
0,501 do wart ein bote gesendet .
0,502 unt saget philippus waz man reiht .
0,503 uon ainer siner untertaner dieht .
0,504 uon sinem manne ze thelemone .
0,505 daz s im unrehte wolten lonen .
0,506 der triwen der er mit in habe begangen .
0,507 si heten . z ein anderen geuangen .
0,508 unt wolten ummaze wider in stellen .
0,509 alexander nam sine gesellen .
0,510 frumeclichen er dar reiht
0,511 also diche der stolze man deht .
0,512 in die burch er giench
0,513 den burgrafaen er dar uffie fiench .
0,514 die bosen er dr abe stiez .
0,515 die sinen er dr uf liez .
0,516 unt nam er scaz unt gewant .

0,517 unt allez daz er da fanht .
0,518 unt lehnte alle sine man .
0,519 mit dem daz er da gewan .
0,520 unt als er do widerreihht .
0,521 do begagent ime ein meror arbeiht .
0,522 da widerreihht . ime pausonias .
0,523 der ein richer marcgrafe was .
0,524 unt fuorte die chunnigin in sine gewalt .
0,525 a wie sere er s da zestede engalt .
0,526 daz was div scone olimpias
0,527 div alexanders muoter was .
0,528 sinen uater lie er thotwnt .
0,529 daz wart ime da gitan rihte chunt .
0,530 alexander was ein helt frumeclich .
0,531 den schilt zuht er uur sich .
0,532 unt als er ime was wol naht .
0,533 uf rihte er sinen faphf .
0,534 sprancde da r pausoniam gesach .
0,535 durh sinen buch . er stach .
0,536 zuo der erde er in warf .
0,537 er sprach "dis stivphaters ich nievht bedarf ."
0,538 Alexander sprach zuo den gesinden .
0,539 unt hiz den marcgrafen us pinden .
0,540 er fuort in lemptigen in sin lant .
0,541 a wie siech er sinen uater uant .
0,542 der wunden er nevht genas .
0,543 die ime slucg pausonias .
0,544 also alexander heim chom .
0,545 er geinch fure sinen uater stan
0,546 er sprach "uater wil du ivet sprechen .
0,547 du maht dich haizen rechen ."
0,548 er sprach "sun du heiz in slahen ."
0,549 daz was uil schiere getan .
0,550 dar nach uber ummanegen tach .
0,551 philippus da toht lach .
0,552 Unde also philippus was begraben .
0,553 do wart alexander ze chunig erhaben .
0,554 starche wovs ime sin gewalt .
0,555 do alrerest was er zewainzec iare alt .
0,556 daz er mit listen unt mit mahten .
0,557 sin riche wol berihten movhte .
0,558 ich sage iv wie er s began .
0,559 er nam sin allergetriwisten man .
0,560 die ime ze siner note .
0,561 ie waren einmuothe .
0,562 er sprah "herre . wir ne haben nieuth ze bitene
0,563 wir muzen her laiten .
0,564 chriechlande z eren .

0,565 dar an gedenchent herre .
0,566 daz man ie uber unser lant .
0,567 die allerthuriste chunege uant .
0,568 des lazen wir die enkelten .
0,569 die . uns den zins hiezen kelten .
0,570 hundert jar unde me .
0,571 daz in ze laster erge .
0,572 daz wir des zinses werden los
0,573 swer da wil snelez ros .
0,574 beidu wafen unde gewaht .
0,575 des thuon ich ime alles guothen raht .
0,576 an alle sine arbeiht .
0,577 swer noch mit mir bestet .
0,578 deme tel ich lib unde guot .
0,579 unde trage ime imer willigen muot ."
0,580 unde als er diz gesagete .
0,581 ir niehein langer dagete .
0,582 si sprachen alle mit ainer zungen .
0,583 "got behuote uns disen chunich iungen .
0,584 daz er mit genaden uil lange muze leben in sinem riche .
0,585 so we dem der ime geswiche ."
0,586 ER hiez do gebieten herreuart .
0,587 als im da geraten wart .
0,588 dar zuo was ime uil liebe .
0,589 er sante boten unde briefen .
0,590 ze chriechen unde ze mazedon .
0,591 den bet er den starchen lon .
0,592 ze kalabre er enpoht .
0,593 daz s im hulfen zuo der noth .
0,594 ein stat heizet nicomedias .
0,595 da sancte pantaleon gemartereht was .
0,596 die fuorin sine heruart . mit manegem helide .
0,597 tusent brahten sie ime ze helfe .
0,598 do hiz er uber lant gebieten
0,599 mit tro ioch mit miete .
0,600 daz s ime ze helfen chomen .
0,601 also sie sine note uernamen .
0,602 unde swem daz uersmahte
0,603 daz er sin hovbet uerlorn hete .
0,604 Uil erhaft er sin gerette scuoph .
0,605 des tages do er sich uoz huob .
0,606 sibenzech tusent was sines hers .
0,607 daz schiphet er uber ain ende des mers .
0,608 unde hiez den zins da enphaen .
0,609 daz was wider dario getan .
0,610 er fuor dannen in sicilienlant .
0,611 unde ferweltigot alle die er da uant .
0,612 unde tete sie swergen herreuart .

0,613 daz sin uater nie erwarph .
0,614 alsus meret er sin her .
0,615 unde schiphte sich da uber mere .
0,616 unt fuor ze tale wart .
0,617 unde uerlie sich an die scarphen svert .
0,618 Unde also die romere daz fernamen .
0,619 a wie erhapte sie im zegegene chomen .
0,620 si brathen im ze der stund .
0,621 silbers hunderht thusin funht .
0,622 unde einen mantel also edele .
0,623 so chunich under diseme himele .
0,624 uon phelel noch uon gimme .
0,625 nie neheinen movhte gewinnen .
0,626 unde eine chorone div was al rohtgolt .
0,627 alsus macheten si in den chunihc holt .
0,628 div gabe was ime dancname .
0,629 des lobet er die guoten romare .
0,630 Zehen hundert er mit ime nam .
0,631 d er uon rome dar chom .
0,632 unde fuvr zuo africano .
0,633 der darios undertane .
0,634 mit gewalte reit er da durch .
0,635 ze kartagine in die burch .
0,636 die burgare taten ime die sicherheit .
0,637 uil luzel ir mit reiht .
0,638 wande s in nummuoth waren .
0,639 wider romare die maren .
0,640 Dannen wurden sine boten gesant .
0,641 uber al meridienlant .
0,642 dannen in bethaniam .
0,643 unde dannen in galatiam .
0,644 kartanensen er enbot .
0,645 si ne chomen unde wurden undertan .
0,646 er hiez si alle an daz cruce slahen .
0,647 Unde als si daz uernamen .
0,648 newith langer si ne waren .
0,649 sie chomen algeriht .
0,650 zuo des chuniges gesiht .
0,651 sie braten silber unde golt .
0,652 unde macheten in den chunich holt .
0,653 er ne wolte ir goldes newiht enphahen .
0,654 er bestunt sie mit genaden .
0,655 wande si duhten in frumich unde balt .
0,656 er nam er ein thusint in sine gewalt .
0,657 unde fvvorti sie in egypto allesamt .
0,658 unde stiften da z eren sines namen .
0,659 eine burch div wart nah im genant .
0,660 der erfvvore al div lant .

0,661 er ne gesahe niemer neheine .
0,662 div zuo ir mohte werden gezalt .
0,663 Babilonia ne wart nie so wiht .
0,664 so man sie noch ane siht .
0,665 troia ne mohte sich z ir niht gemazen .
0,666 a was gapadotia gebrach .
0,667 daz si ware also uast .
0,668 pede noch kartago .
0,669 ir newedere was so
0,670 richer was disiv burch noch .
0,671 danne rome oder antioch .
0,672 alexandria si hiez .
0,673 sinen namen er dr inne liez
0,674 dannen er durch daz lant brach .
0,675 er tede ein michel ungemach .
0,676 er was dario gram .
0,677 er storte galileam .
0,678 da wart in neptalimlant
0,679 al ferhert unde ferbrant .
0,680 also tet er zabulon .
0,681 die richen burch naason
0,682 er zestorte samariam .
0,683 also tet er zityam .
0,684 diz was da naamen inne was
0,685 uon der miselsuhte genas .
0,686 er zestorte ouch pitanium .
0,687 da iudiht holofern sin hobet nam .
0,688 unde zestorte ouch iudeis lant .
0,689 dar nach wart ierusalem ferbrant .
0,690 unde bethlehem diu da bi stet .
0,691 so niemen mit ime streit .
0,692 al biz er tyre zuo treib .
0,693 a waz ime da helede tot peleih .
0,694 Tvre was ein stat groz .
0,695 daz mere si alle umbefloz .
0,696 da warn die mure harte .
0,697 uon quadrestein geworht .
0,698 mit iserenen spangen .
0,699 was al daz werch befangin .
0,700 unde da zuo morter unde bli .
0,701 wie mehte siv uester sin .
0,702 dri waren der mure .
0,703 umbe waz solte si daz guot uerturen .
0,704 daz golt sie nie ne halen .
0,705 sie thaten die turne malen .
0,706 daz daz rothe golt . dar ab schein .
0,707 gemuseth oben an den stein .
0,708 dan zesviscen gingen de bogen .

0,709 si waren al mit golde bezogen .
0,710 die turne stunden uil nach .
0,711 wiht was der hof da .
0,712 uil groz scade
0,713 daz si alexander zebrach .
0,714 durch sin ubermuotecheiht .
0,715 siv was einer mille breiht .
0,716 er ne waiz in anders nieheine scult .
0,717 niewan si waren einem chunige holt .
0,718 daz was darios rex psaru- .
0,719 deme sie undertan waren .
0,720 Nv uernement ovch ein ander .
0,721 zuoz in sante alexander .
0,722 unde sprac ob si in ze chunige wolten schaphen .
0,723 unde ime wesen undertan .
0,724 unde die burch gaben in sine gewalt .
0,725 da saz inne uil manec helt .
0,726 die alle wider z im santen .
0,727 wande si sin niet iht bechanden .
0,728 si sprachen daz si in niene fovrten .
0,729 noch si sin ze niehte bedorften .
0,730 wan sie trovgen ime willigen muoht .
0,731 unde gaben ime gerne durch minne ir guot
0,732 unt also dise boten wider chomen .
0,733 uernement wie in alexander uernami .
0,734 mit zorn er der nider saz .
0,735 bi sine- hals er sich uermaz .
0,736 er sprach sin scolte porlange sin .
0,737 er wolte ouch
0,738 ne waiz ich wie ir name si .
0,739 unde sante si dar widere in die stat .
0,740 unde hiez den alsten sagen daz .
0,741 war sie ir sin thadin .
0,742 daz si den chunich fersmahten .
0,743 der rome min siner grahp .
0,744 unt al chrichen under sich hiete braht .
0,745 unt also die boten fvvr chomen .
0,746 unde die burgare ir rede uernamen .
0,747 si thaden stolzen liuten gelich .
0,748 unde hingen sie alle uf ein zuich .
0,749 Nu beviensch alexander die burch mit here .
0,750 mit den scephen in dem mere .
0,751 mit sturme er sie starche dwanc .
0,752 er druog in ubelen gedanc .
0,753 si werten sich uone prise wole .
0,754 der wier ne was nehein zal .
0,755 der in der burch was .
0,756 zwainzchc thusen unde baz .

0,757 also uil slugen si ime sines hers .
0,758 daz die . unde des mers .
0,759 uon dem pluote wurden rot .
0,760 der wint teht in uil noht .
0,761 daz siner scephe ein hunderht uersunchen .
0,762 unde sine helde all ertrunchen .
0,763 do alexander daz gesach .
0,764 daz ir also uil thot lach .
0,765 des sturmes hiez er abe stan .
0,766 er thete die secph wider in die habe gan .
0,767 Alexander bedathe sich .
0,768 des scaden ummaczlich .
0,769 er was ein listich man .
0,770 groze povm er gewan .
0,771 unde thede die zesamene spannen .
0,772 uon chundigen zimbermannin .
0,773 unde hiez daz mit steinen uullen .
0,774 daz was an sinem willen .
0,775 swane er sin ebenhoch ze dem turne brathe .
0,776 daz er lange povme dr abe rihti
0,777 die der zuo den zinnen mahten gan .
0,778 er wolte sie mit nide bestan .
0,779 Einluph tusint sant er sines hers .
0,780 nach den povmen uber mer .
0,781 un- hiez die povme uellen .
0,782 er wolte perfriht stellen .
0,783 uf einen perc heizet libanus .
0,784 da stet uf manch cedrus .
0,785 diz ist libanus der in arabie- stet .
0,786 da der iordan uz get .
0,787 diz ist noch der selbe walt .
0,788 den der chunich salemon galt
0,789 wider einen chunich der hiez sigiram .
0,790 er gab ime halb galileaam
0,791 wande im die povme wol geuielen .
0,792 ze zimber ze chielen .
0,793 si n erfulent ouch niemer me .
0,794 weder durh regen noch durch sne .
0,795 Nude also arabati daz befunden .
0,796 die tyrin wole guotes . gunden
0,797 newht langer si n enthewalten .
0,798 die den forst ualten .
0,799 si namen ein ungezogenlich phant .
0,800 unt ersluogen ein tusint .
0,801 er nam .
0,802 des hers daz er noch do habete .
0,803 ein herzoge hiez sich gracto .
0,804 unde ein ander der was perdix genant .

0,805 den beualch er z gesez in die hant .
0,806 unde fuor
0,807 bewarte sine holden .
0,808 die da zimberin solten .
0,809 bis iz alliz gereite wart .
0,810 do nam er die wideruart .
0,811 Nu was alexander mit here .
0,812 nach dem povmen uber mere .
0,813 des wurden die burgeare stolz unt balt .
0,814 si ranten uz mit gewalt .
0,815 ubirmuotechlihe si sich rachen .
0,816 ein castel si im zebrachen .
0,817 eines movrngens fruo
0,818 mit fuure gingen s imme zuo .
0,819 unde slugen unde fiengen .
0,820 alle die si dr uff begiengen .
0,821 noch mag ich iv sagen mere
0,822 si besencten sich in den se .
0,823 daz man si in allem tage niene sach .
0,824 e man die gruntfeste zebrach .
0,825 unde sancten sich in des sewes grunt .
0,826 unde sie chomen afer uf wider gesunt .
0,827 Vnde also daz castel was endwart .
0,828 do huob sich aein sturm hart .
0,829 uon den herzzogen zevin
0,830 do beleib der burger nie nechen .
0,831 a wie maneger des sturmes nechalt .
0,832 ze zwain hunder waren si gezalt .
0,833 die da thot piliben .
0,834 alda si s uon den porten triben .
0,835 da wart in gescadet uil sere .
0,836 duo alrerist chom ir here .
0,837 owe daz tyre duo niht genas .
0,838 also wol ir ganegent was .
0,839 Nu will ich sagen allen die des niene chunnen .
0,840 wie tyre wart gewnnen .
0,841 alexander chom mit grozer chrefte .
0,842 unt tet sephf zesamen hephten .
0,843 imer zwae unde zwaie neben .
0,844 unde hiz den isrinen pe-te geben .
0,845 unde tet die mit hutten also uberziehen .
0,846 daz die unden dar in niene giengen .
0,847 perfriht dar uff si sazten
0,848 uon den allerleingisten povmmen . die sie habeten .
0,849 unde triben si zuo den zinnen .
0,850 alsus wolten si die burch gewinnen .
0,851 Der chunich hiez die mure hauwen .
0,852 mit steliner gezowe .

0,853 da huob sich ein sturm uil groz .
0,854 a we man warf unde scoz .
0,855 uon den ainen z en andern .
0,856 daz alle die mahte wndern
0,857 die ie dechaenen sturm gesahen .
0,858 uon der werlte div da toht lach .
0,859 so wart daz mere allez ein bluot
0,860 des wohs dem chunige wol sin muot .
0,861 er bestuont sie mit nide .
0,862 uon den perfriden hiez er sie triben .
0,863 die waren hoher danne die turni .
0,864 daz tet er in ze zornne .
0,865 da wurden die schonen turnne mit den bogen .
0,866 in daz wazer gezogen .
0,867 unde brachen da der besten mure eine .
0,868 die ie burch gewan . deheine .
0,869 Also si ze der ander chomen .
0,870 zederbovmi sie der namen .
0,871 unde dar zuo lange dannen
0,872 duo hiez er perfride spannen .
0,873 unde rihte die uf mit liste- .
0,874 unde si sazten si uf zuo der feste .
0,875 alexander steich uf daz obrist gewer .
0,876 unt gebot den sturm uber al daz here .
0,877 unde liez do mit der werlte
0,878 den ernststurm wernden .
0,879 mit hameren man die burchmure zebrach .
0,880 a waz da weirte tot belach
0,881 alexanders schilt was helfenbein .
0,882 bezzer wart nie nechein .
0,883 sin helm was also guot .
0,884 so der ni nechein swert durch gewuoht .
0,885 in der hende truch er einen ger .
0,886 uon govlde gedroseht uil her
0,887 tuo sach er stan . dem herzogen .
0,888 dem al tyre was undertan .
0,889 kegen ime uf der mure .
0,890 er lie sich es nieuht ferturen .
0,891 er scoz in mit tem gere durch .
0,892 unde falt in tot in die burch .
0,893 Duo teht der chunich ainen spruhnc .
0,894 mit im manch helt iunc
0,895 fon den perfriden uf die zinnen .
0,896 alsus wolden sie die burch gewinnen
0,897 uier tusint ir mit ime spranhc .
0,898 sie truogen ubelen gedanc .
0,899 min wan ne triege mich .
0,900 da gespranch ir hetelicher

0,901 da zestunt .
0,902 daz er niemer mere wart gesunt .
0,903 daz ir ein hunderet tot lach .
0,904 an andere ungemach .
0,905 da brachen sie die besten mure zuo der erde .
0,906 div der ie dehein solte werden .
0,907 Da was daz uelt uil wiht .
0,908 da huob sich der bitteriste strit .
0,909 da ir noch ie abe horte gesagen .
0,910 da ne gesach man nechein zagen .
0,911 da mahti man manegen deggen scovwen .
0,912 al durch den helm uerhuowen .
0,913 unde manegen riter iunhc .
0,914 al durch die halsperge uerwnt .
0,915 daz er der wnde niht genas
0,916 want daz swert scarf was .
0,917 durch den scilt floch der ger .
0,918 unde machet manegen helt ser .
0,919 da hete iamer ein also der ander .
0,920 ane der wnderliche alexander .
0,921 er sluoch des livtes die menige .
0,922 gebeizzet was sin brunne .
0,923 in eines wurmes bluote .
0,924 er stunt ime stolzes muotes .
0,925 hurnen was siv ueste .
0,926 ez chom uone grozen listen .
0,927 ich laze thusint unt auer thusint .
0,928 uf der erde mahte niemen gan .
0,929 also uil lag ir da erslagen .
0,930 daz iz iv unzellich ist ze sagen .
0,931 die chunen uon tyre .
0,932 des lebenes uil gire .
0,933 sie fuhten also wildiv swin .
0,934 swes tot nicht solte sin .
0,935 Die umbe die burch lagen .
0,936 si ne dorften sich des siges niemer geruomen .
0,937 wande die burgere brachen si durch .
0,938 unde wichen aber wider in die burch .
0,939 da uerlos er manegen duren chent .
0,940 alexander teht in groz unreht .
0,941 Harte zurnt sich alexander duo .
0,942 mit nide giench er den porten zuo .
0,943 die dar uf waren .
0,944 si taten scahden mere .
0,945 uf ter porte stunten drie turni
0,946 da geschiet er abe mit zorni .
0,947 des mordes des er an sinen holden gesach .
0,948 mit sinen furste- er sprach .

0,949 "herre bedenchet iuch s inziht .
0,950 wand ir tiure chnete siht .
0,951 nement si nu den obern sige .
0,952 so ist unser spot uber daz lant ."
0,953 der raht der ime do wart getan .
0,954 den mugent ir schiere uersten .
0,955 sie rieten daz er mänge getaete rechen .
0,956 unde liezen die turni brechen .
0,957 zwa unde sibenzehc mangge wurden da gestalt .
0,958 sie wurfen alle mit gewalt .
0,959 si waren uil wol gesaelht .
0,960 si wurden in driv getailt .
0,961 si wurfen fuvr unde witi .
0,962 das was alexanders site .
0,963 daz er chriechis fuvr chunde wurchen
0,964 unde liez iz niemen merchen .
0,965 uon wielcer liste . iz im chom .
0,966 daz ez in dem wazzere bran .
0,967 daz warf er in zuo der burch .
0,968 da mite brante er siv al durch . unde durch .
0,969 unde dar zuo manegen herten stein .
0,970 do belaib der burgare ni enhein .
0,971 si musen duo alle uon der zinnen gan .
0,972 wande si ne getorsten da nie langer gestan .
0,973 fivr des fuures forhten .
0,974 alexander der tranch zuo der porte
0,975 mit nide er sie der nider brach .
0,976 a waz ime da helede tot lach .
0,977 des waer im z eren me gesiht .
0,978 forten si der mangge wurfe nicht .
0,979 so solt im div burch werden tiure .
0,980 gewun er s nicht . mit chriechissen fiure .
0,981 Alexander wolte sich wole rechen .
0,982 er hiez die trie turne nider brehen .
0,983 die daz fuur hiete uerlazen .
0,984 der allerrichisten burgare . die in der burch sazen .
0,985 der thede er driv tusint fahen .
0,986 unde hiez sie blenden unde hahen .
0,987 wider sine furstin drin .
0,988 die er da for sante der in .
0,989 des siges des er da nam .
0,990 wer ez ein wole bedaht man .
0,991 er ne wurd es niemer ze fro .
0,992 wande ez gescah siht also .
0,993 daz ir mere was der ime da toht belaib .
0,994 tan der inderhalb tyre ware .
0,995 weder geste oder burgare .
0,996 al zestoret was . Tuo tyrus .

0,997 die stifte sih ter chunich apollonius .
0,998 den antioch uber mere iagete .
0,999 wande er imme sagete
0,1000 daz rehte an einem brieue .
0,1001 daz er mit siner tohtter sliefe .
0,1002 tyre is noch div selbe stat
0,1003 da daz heiden wib unseren heren . paht .
0,1004 daz er ir tohter erlostete .
0,1005 uon dem ubelen geiste der sie note .
0,1006 Dar nach uber unlanch stunt .
0,1007 so wart dario chunt .
0,1008 mit einem der uone tyr entran
0,1009 daz alexander der chune man .
0,1010 sine livte habete geuangen .
0,1011 unde geblentet unde erhangen .
0,1012 unde div schone tyre lag en chole .
0,1013 unde er sie hieze daz laster dolen .
0,1014 er sprach er movhte sich scamen .
0,1015 sines chunichliches namen .
0,1016 daz er in nivht ze helfen chome
0,1017 duo er ir groze noht fername .
0,1018 Ain richer chunich was darios .
0,1019 her wider daht er alsus .
0,1020 alexander duhet in lvizel .
0,1021 er sante im eines chindes . stuzel .
0,1022 unde dar zuo ein scuohpant .
0,1023 also er z in sinem herzen uanht .
0,1024 unde ein wenich choldes in einer lade
0,1025 er wande er ime iemer muohte gescaden .
0,1026 unde sante im dise drie sache .
0,1027 unde tet des einen brif machen .
0,1028 daz ez der brif benante .
0,1029 umbe waz er ime die drie gebe sante .
0,1030 Aen stuzel sante er im umbe daz .
0,1031 daz ime daz stunde michel baz daz
0,1032 er mit den chinden spilen gienge .
0,1033 dann er . sine livte cholte oder hienge
0,1034 daz bezechinoht daz scuochpant .
0,1035 daz alexander wart kesant .
0,1036 daz er mit tagelichen dienen solte .
0,1037 ob darios wolte .
0,1038 want en scuochpant nuzet man tagelich .
0,1039 daz er dar an bedachte sich .
0,1040 un lieze sin irreheit stan .
0,1041 unde ware sineme herren undertan .
0,1042 also ander sine forderen heten
0,1043 die sich nie wider ime gesazten .
0,1044 Daz bezeichnoht daz cholt

0,1045 daz er rehte merehen scolte .
0,1046 daz daz ter zins ware den ime sin uater chulte .
0,1047 alleriarilich turch sine hulde .
0,1048 daz er in des praecht innin
0,1049 unde fvr im den zins gewinnen .
0,1050 unde daz er des choldes solde leben .
0,1051 un- er niemen nievht solte nemen .
0,1052 unz er wider haim chome .
0,1053 daz er niemen sines nievht name
0,1054 un- daz er schiere dannen rithe .
0,1055 unde nievht langer bite .
0,1056 unde daet er euwht mere wider sine willen .
0,1057 er hiez in mit dem besemen uillen .
0,1058 Unde also alexander den brif gelas .
0,1059 owi wi smae ime was .
0,1060 daz man imme trovte ze slahen .
0,1061 die boten hiez er alle uf hahen .
0,1062 der boten ainer z im sprach .
0,1063 "herre tuot uns nehain ungemach .
0,1064 wande ez ne ducht ivch gnade noch reht .
0,1065 swa so ivier chnet .
0,1066 ivier botescahpf tribe .
0,1067 daz er dr umbe toht belibe .
0,1068 unde niene scentet euieren namen .
0,1069 wir iehen des herre allesamt .
0,1070 daz under disen chunigen allen .
0,1071 nieheiner ze u mach geuallen .
0,1072 der mit also grozer fruommichheit .
0,1073 sin here uber la-t leit .
0,1074 so ir herre chunich tuoht .
0,1075 nu bedwinget ivieren muoht .
0,1076 unde habet unser maze .
0,1077 wande wir getorsten die bohtsapf niet lazen ."
0,1078 Alexander bedahte sich .
0,1079 er wart den boten genadich .
0,1080 er ne waiz in nieht umbe die sculde
0,1081 er gab in wider daz selbe golt .
0,1082 daz ime uon ir heren bechom .
0,1083 er sprach "a wi wie ubele ich ime des gan .
0,1084 daz mir ivier herre drovweht ze slahen .
0,1085 er haht geliche getan .
0,1086 also der bose rude teot
0,1087 des nahtes also er eueht uerstet .
0,1088 so ne getarr er sich dar naher nivht geziehen .
0,1089 er beginet uzwerd flihen .
0,1090 unde wizzeht iz allez mit siner cheln
0,1091 unde beginnet darwers belen ."
0,1092 Er sprac "iviers herren brief mir nievht geuelleht .

0,1093 wande er z er gebe niene gehillet .
0,1094 div gabe div ist lobelich .
0,1095 unde der brief der ist redelich .
0,1096 er bezeichnenet alle ein ander .”
0,1097 sprah der chunige alexander .
0,1098 “der stuzel de mer ivier herre hab gesant .
0,1099 da mit hat er mir rechant .
0,1100 daiz allez ane mir sul bestan .
0,1101 swaz so unter deme himele is betan .
0,1102 unde ich is alles herre sul werden .
0,1103 uf der scibligen erde .
0,1104 Aen riemen den er mir sante .
0,1105 da mite er mir bechante .
0,1106 daz er sich mir z eigen welle geben .
0,1107 unt in iht minen genaden iemmer welle leben .
0,1108 daz er min deinest welle sin .
0,1109 ze allen heruerten min .
0,1110 daz golt daz ir mir hab praht .
0,1111 da mit habet ir mir gesaget .
0,1112 da ich mir al einem wol gezeim .
0,1113 daz ich den zins uon ime neme .
0,1114 u-de dar zuo uon allen landen .
0,1115 unde begwinge die ze minen handen .”
0,1116 Diz sazte man do allez an einen brief .
0,1117 daz was dem chunige alexander lieb .
0,1118 er screib in selbe mit siner hant .
0,1119 er wart dem chunige dario gesant .
0,1120 er inbot im ouch da mite
0,1121 daz er doch trie manoht bite .
0,1122 er sprach er ne wolte nievht langer lengen .
0,1123 zehinzech tusint wolte er bringen .
0,1124 uber wazer eufrates .
0,1125 neveht gedanchet er des .
0,1126 ze babilonii fur die groze stat .
0,1127 alsus wart an den brif gesazt .
0,1128 also lange so er des cinses nieht ne wold enpern .
0,1129 er solte sin da heime waern .
0,1130 mit also getaner mazze .
0,1131 er solt im sin hovbeht lazen .
0,1132 unde ob er daz tagedinch liezi .
0,1133 daz er niemer chunnich kehizze .
0,1134 er bestunde daz uolcqwic .
0,1135 darios was ein chunnich rich .
0,1136 unde also der brif fur in chom .
0,1137 freislich er in uernam .
0,1138 mit zorn er uf fvvor .
0,1139 mit sinem riche er swor .
0,1140 er sprach “daz mich ie der bescalt

0,1141 des uater mir den cins chalt .
0,1142 ich sal z an die cheren .
0,1143 iz ne reget im niemer z eren .”
0,1144 er sprach noch ouch niemer guot ende genaeme .
0,1145 daz er ie durch sin laster uz chome .
0,1146 Darius sante einen brief
0,1147 zewein herzogen die waren ime lieb .
0,1148 unde bat daz si alexander . div scehf pesparten .
0,1149 unde sin werten .
0,1150 unde daz si in wider stiezen .
0,1151 unde sie in uber daz wazer niene liezen .
0,1152 uber daz wazer eufrates .
0,1153 daz was marios unde typotes .
0,1154 daz si in selben sazten . der nider .
0,1155 unde in bunten als ein wider .
0,1156 daz s ir manheit gedaechten .
0,1157 daz si in ime lemtigen braehtin .
0,1158 er sprach wie gerne er ime helfen solte .
0,1159 z allen den eren er wolte
0,1160 der hoiste sin uf der erde .
0,1161 unde muoste daz an aniem galgen werden .
0,1162 Do sprachen die zewne herzzongen .
0,1163 “unser herre ist uil sere betrogen .
0,1164 daz er uns den man hiezeht uahen .
0,1165 dem alliv lant sint undertan .
0,1166 unde die fursten habe-t geuangen .
0,1167 unde sin wille ist regangen .
0,1168 uber ierusalem unde uber tyre .
0,1169 sin selbes ist er gire .
0,1170 rome und egyptelant .
0,1171 stent beidiv in siner hant .
0,1172 kartago div riche burch .
0,1173 mit gewalte reit er da durch .
0,1174 unde hat manege guote burch zestorcht .
0,1175 die unseren herren ane horent .
0,1176 unde unser herre hat iz allez uersezzen .
0,1177 der chunich alexander hat sich noch aines meren uermezzen .
0,1178 daz er n mit sinem aigeme lande uahe .
0,1179 mit grozem urliuqe besta”
0,1180 si sprachen “unser herre hantil iz noch mit sinne .
0,1181 ich wane er s michel sande gewinne .”
0,1182 Unde also der bote widerchom .
0,1183 unde darios der zevver herzogen rede uernam .
0,1184 sere zurn er sich des
0,1185 do nam er ainen herzogen der hiez sich mennes .
0,1186 unde dar zuo tusint man .
0,1187 die er alle uber naht gewan
0,1188 unde sante si alexander gegen .

0,1189 unde hiez den zwein herzogen sagen .
0,1190 lizzen s in ubr ez wazer uaren
0,1191 ez solt in iemer mere scaden .
0,1192 si ne gewunnen sin niemer frum .
0,1193 noch si ne getorsten niemer fur sine ovgen chomen .
0,1194 er sprach wurde alexanders wille gendeth .
0,1195 sie wurden aller der mite gescendeth .
0,1196 Die zewne herzoge- getorsten nevth lazen .
0,1197 alle da ir man sazen .
0,1198 si santen alrithte
0,1199 uber allez ir gerihte .
0,1200 die sie zesamene braten .
0,1201 ze zehen tusint mahti man sie ahten .
0,1202 unde drizech tusint dar zuo .
0,1203 er hate einen ubermuoten muoht .
0,1204 er sciphffeht sich zeforderest uber de fluoht .
0,1205 an eime stade chomen si im enkegen .
0,1206 alsus hort ich matster alberichen sagen .
0,1207 da hub sich ein sturm uil groz .
0,1208 ein tusint beleib ime da tot .
0,1209 uon chriechisen chunne .
0,1210 e alexander den furt ie gewunne .
0,1211 Du chom alexander selbe geriten .
0,1212 also er s uil chume habti gebite- .
0,1213 uf buzival er reiht .
0,1214 do sluog er also der thoner
0,1215 for dem sich niemen mach bewarn .
0,1216 swer in fon ferre sach geuaren .
0,1217 e er hinder sich gesach .
0,1218 so het er sin ainen slach .
0,1219 daz er sin pluoht allez spye .
0,1220 unde lebte ouch dar nach niewht me .
0,1221 sin schaft was mare groz .
0,1222 svewm wart ein slach oder ein stoz .
0,1223 der was des gewissen todes .
0,1224 unde er n beiz dar nach niemer brovtes .
0,1225 Mennes was ein herzzog genant .
0,1226 den darios hete dar gesant .
0,1227 der was ein helt uurmeclich .
0,1228 ein hundert riter hat er umbe sich .
0,1229 mit swerten uil guoten .
0,1230 die taten si in ze huote .
0,1231 z ime mahte niemen brechen .
0,1232 wan der s lebenes wolte uergezin .
0,1233 alexander wanht sin uane
0,1234 er begunde sine helide manen .
0,1235 er spraengeht ze mennes wert .
0,1236 un- liez iz nieuht durch die scarphen swert .

0,1237 durch alle die sine er brach .
0,1238 mennes er durch den schilt stach .
0,1239 daz daz pluht begunde rinnen .
0,1240 mennes stach hine wider durch den sinen .
0,1241 der was feste helfenpein .
0,1242 daz daz pluht an dem spere schain .
0,1243 ir iewedere stach den anderen nider .
0,1244 alda grifen si z en swerten sider .
0,1245 a wi daz fuur dar uz spranch .
0,1246 da ein stahel wider den ander dranch .
0,1247 grozer slege wurden nie getan .
0,1248 sie ne sluge wilen samson .
0,1249 der die grozen maht an imme truoch .
0,1250 daz er mit eines eseles bachten ein tusint livtes ersluoch .
0,1251 a wie mahte daz ie werden .
0,1252 mennes der sluoch alexandern zuo der erde .
0,1253 Alda wart ime der helm ab geprochen .
0,1254 der manegen grozer slege
0,1255 der der chunich alexander finch .
0,1256 unde war er also wol gewafenht nicht .
0,1257 er ne beswocht niemer z tages licht .
0,1258 wane daz sines todes noch neweht solte sin .
0,1259 ein riter der hiez daclym .
0,1260 der was mit alexander da .
0,1261 unde stunt ime des tages uil na .
0,1262 der ander hiez ivbal .
0,1263 der sich uil ungerne in dem sturme hal .
0,1264 der was dar chom mit teme herzogen .
0,1265 unde hiete daz swert erzogen .
0,1266 unde wolde alexander geben ainen slach .
0,1267 da er im den hals ploz gesach .
0,1268 daclym wart der eror .
0,1269 er loste sinen herren .
0,1270 er sluoch ivbal uon oberest siner zende .
0,1271 al nider durch die lende .
0,1272 unde machet zewene halbe man .
0,1273 a wie guoht ainen lob daz swert gewan .
0,1274 Daclym den helm gebranc .
0,1275 sinem herren . er n uf daz hobet pant .
0,1276 sin hovbet was im erscellet .
0,1277 da er der nider wart geuellet .
0,1278 nievht uerwielt er sich siner rede .
0,1279 er was in grozer unhuge .
0,1280 er warf sich umbe also aien helit .
0,1281 "nu wert hiuch herre chunich ."
0,1282 alsus sprach sin riter daclym .
0,1283 "hivte si ivver ellen schin .
0,1284 wande ir ein divrre keneht siht .

0,1285 nu zihet swert des ist ziht .”
0,1286 Unde alexander wart los .
0,1287 do spranc er uf sin ros .
0,1288 sin ovgen waren freislich
0,1289 sine fient erforhten sich .
0,1290 unde also er z im selben chom .
0,1291 buzifal er mit den sporn nam .
0,1292 er tete dachlyme danch .
0,1293 unde frumit manegen swertslach .
0,1294 under die menege er reiht .
0,1295 also der daz kras . nider sleht .
0,1296 so strowwet alexander
0,1297 diz ne mohte neham ander .
0,1298 div menige div was maregroz .
0,1299 die der herre sluch unde soz .
0,1300 also uil lag er da reslagen .
0,1301 daz iv unzallich ware ze sagene .
0,1302 persen unde chriechen .
0,1303 an wunden unde ane siechen .
0,1304 man sageht uon dem sturm der uf wolfenwerde gescah .
0,1305 da hiltent uater tot lach .
0,1306 zewisken hagenen unde waten .
0,1307 so ne movht er her zo nieth katen .
0,1308 iedoch ne movht nechain sin .
0,1309 noch herewich noch wolfwin .
0,1310 der der ie gevaht uolcwich
0,1311 dem chunige alexander gelich .
0,1312 man list uon guoten cheneten .
0,1313 die wol getorsten uehten
0,1314 in troiare lide .
0,1315 e sich der sturm gesiede .
0,1316 achilles unde ekektor .
0,1317 paris unde nestor .
0,1318 die manich tusi-t erslugen
0,1319 unde die ouch scarfe gere truogen .
0,1320 so moht under in allen
0,1321 zuo alexander nieuht geuallen .
0,1322 Pincun was ein graue genant .
0,1323 der uurte den uanen an der hant .
0,1324 den er alexander abe brach .
0,1325 den menses der nider stach .
0,1326 unde also er den grauen hate erhorn .
0,1327 duo rurht er z ros mit den sporn .
0,1328 zuo dem grauen er reiht .
0,1329 er sprach “daz was ein michel chintheit .
0,1330 daz min uane chom in ivier hant .
0,1331 iz wirt iv ze laster gewant .”
0,1332 der graue daz ros umbe warf .

0,1333 a wie schir er da restarb .
0,1334 er sprach "gewisse fuor ich einen uanen .
0,1335 der churze wile mit mir sol wonen .
0,1336 ich sol dir n also wider gebent .
0,1337 daz ez dir gaht an din leben ."
0,1338 mitsamht deme worte .
0,1339 so stach er in mit dem orte .
0,1340 daz an dem spere was .
0,1341 daz er der wunden wol genas .
0,1342 oberhalb der bra .
0,1343 da was ter sich ketan .
0,1344 nu uernement waz alexander sprah .
0,1345 als in pincun gestach .
0,1346 du solt lügenare wesen .
0,1347 unde ich sol des stiches wol genesen .
0,1348 mit dem solben worte .
0,1349 gab er im einen slach mit dem swerte .
0,1350 uf daz hovbet er n sluch .
0,1351 durch den hals unde durch den huot .
0,1352 der slach was unsuzz .
0,1353 daz huobet uiel ime uor die suoze .
0,1354 Unde alexander sinen uanen wider gewan .
0,1355 menses aber ime zuo chom .
0,1356 den herzogen er der nider stach .
0,1357 do gab er im mit dem svert ainen slach .
0,1358 uf den arm er in sluoch .
0,1359 da er daz sver inne truoch .
0,1360 der slach was uone grozer maht .
0,1361 durch den arm unde durch den scaph .
0,1362 so chom daz svert . gedrunge .
0,1363 unde want ime an der lungen
0,1364 alda uiel menses da nider .
0,1365 persi ne fuhten nievht sider .
0,1366 uzer dem uelde si fluchen .
0,1367 si ne getorsten in selben nicht getruwen .
0,1368 Des wart alexander uil palt .
0,1369 er belait da mit gewalt .
0,1370 zuo den selben stunden .
0,1371 al biz im geheilten sine wunden .
0,1372 u- genahcte sich dario baz .
0,1373 aine burch er ime besaz .
0,1374 div was sardix kenanht .
0,1375 uon sinen wart siv uerbra-t .
0,1376 do nam er silber unde golt
0,1377 er machet ime manegen degen hoht .
0,1378 div selbe burch sardix .
0,1379 uon ir sageht uns daz buhc apokalipsis .
0,1380 daz si der sibben purge aineu ware

0,1381 die got unser haelier ware .
0,1382 in sinem obristden himel nante .
0,1383 du er sante iohannes dar ze poten sante .
0,1384 Unde daz man dario diz gesagete .
0,1385 nivht sere er ne chlagete .
0,1386 er tete also der stolze man deth .
0,1387 der durch sine ubermuoht .
0,1388 sich so uerrer uerwellet .
0,1389 daz er fuor sinen argoren uelleht .
0,1390 unde er sich nievht warnet enziht .
0,1391 owi wi diche er laster gesiht
0,1392 iedoch so swur er ain teil .
0,1393 er sprach so ulf im sines riches heil
0,1394 iz ne scolte niemer uierzehen naht entegan .
0,1395 er solte alexander uf einen povm hahen .
0,1396 daz in z geuugel eze .
0,1397 des er sich ie wider in uermaze .
0,1398 Dannaen wurden sine poten gesanht .
0,1399 uber wazer unde uber lant .
0,1400 unde er hiez sinen fursten daz sagen .
0,1401 unde manegem richen chunige chlagen .
0,1402 herzogen un- grauen .
0,1403 daz si s ime raht . kaiben .
0,1404 un- chomen mit so fruomen chneten .
0,1405 die wol getorsten uehten .
0,1406 mit allen ir menegen .
0,1407 in daz felht mesopotamiam .
0,1408 in der bretten owen .
0,1409 da wolte er sin her besowen
0,1410 er sprach a wi gerne er uername
0,1411 die manegen scar die ime chome .
0,1412 nu wil ich iv chunden uberal .
0,1413 wi uil ain scare haben sal .
0,1414 allen den . die des nivht en wizin .
0,1415 sehs tusint unde sehs hunderet sehsi .
0,1416 des will ich .
0,1417 die fursten will ich zellen .
0,1418 un- die menige div mitsamit in chom .
0,1419 also dario wol gezam .
0,1420 wande er de geweltigiste chunich was .
0,1421 da man uon ie gelas .
0,1422 uil witen ginch sin gewalt .
0,1423 zewein unde drizzech waren sie gezalt .
0,1424 die chunige die z im chomen .
0,1425 do si sine noth uernamen .
0,1426 grauen chomen ime ouch .
0,1427 zei hundert unde sibenzoch .
0,1428 herzogen z im cherten .

0,1429 daz sich sine riter mercthen
0,1430 die zalt man so ich sicher bin .
0,1431 z aht hundert unde trin .
0,1432 uon persin wurden ime gesant .
0,1433 helide sibenzich tusint .
0,1434 wol hulpen ime des .
0,1435 die chunen zinnonenses .
0,1436 si chomen mit fuunzich tusint chneten
0,1437 die wole getorsten uehten .
0,1438 die panfilien daten harte wale .
0,1439 si braten die selben zal
0,1440 noch tuo chom im ain scahr groz
0,1441 die des wiges liuzel bedroz .
0,1442 also si in chunigis reise wol gezam .
0,1443 wande si uon medinriche qvam .
0,1444 medinrich ist noch daz selbe lant .
0,1445 dar der engel mit tobia wart gesant .
0,1446 cilicien heizet ein lant .
0,1447 si bratin im azech tusint .
0,1448 uon niniue wurden ime gesant .
0,1449 ain unde zewainzich tusint .
0,1450 die uzer armeninlant .
0,1451 si braten ime aht tusint .
0,1452 si ne movhten ouch tu nicht baz .
0,1453 diz was da div archa gesaz .
0,1454 div uf dem wazer swebete .
0,1455 da noe inne lebete .
0,1456 ime santen die uon gaze .
0,1457 die uber filistin sazen .
0,1458 di im wol ze troste mohtem wesen .
0,1459 zeirent funf hunderet starker risen .
0,1460 noch do sazen sine frie man .
0,1461 ferre uber frigiam .
0,1462 die trugen ime guten willen .
0,1463 si namen zewinzeh tusint gesellen .
0,1464 unde tatin z im cheren .
0,1465 si gunden im siner eren .
0,1466 also man sinen willen uernam .
0,1467 ferre uber indiam .
0,1468 zevlf tusint si namen .
0,1469 gereitechlichen z im chom .
0,1470 noch do chom im ain wenich here .
0,1471 daz santen ime die uon dem roten mere .
0,1472 ain tusint sleier helede .
0,1473 ze wige wol erwelte .
0,1474 nu uernement war zu man diz her nam .
0,1475 do iz al zesamene chom .
0,1476 z ehs hunderet tusint waren si gezalt .

0,1477 da was der hof manichfalt .
0,1478 unde dar zuo drizech tusint .
0,1479 alsus hete sich darius besant .
0,1480 Unde also diz alexander uernam .
0,1481 er manete sine getrue man .
0,1482 die im ze siner note .
0,1483 ie waren ainmuothe .
0,1484 mit ainer minner menige .
0,1485 so reiht er in zegegene
0,1486 ze mesopotamia .
0,1487 da chomen sie zesamene .
0,1488 in der bretten ouwe .
0,1489 man mahte nie beschowen .
0,1490 schar also edele .
0,1491 uor eineme chunige .
0,1492 die der ie zesamene chomen
0,1493 unde so grozen schaden genamen .
0,1494 alle die wolchwich
0,1495 uon darios zit die
0,1496 alle biz her sint gescheen .
0,1497 si ne muohten dar zuo gelichen nievht .
0,1498 da was daz felt uil breiht .
0,1499 mit ten toten uberspreiht .
0,1500 da alexander durch daz wale brach .
0,1501 a was da helede tot lach .
0,1502 unde also erhin muz iz nu also ergan .
0,1503 "ir sult en zins hie infahen .
0,1504 da ir uil manegen tach habeth nach gesant .
0,1505 den han ich iv braht in diz lant ."
0,1506 mit tem selben worte .
0,1507 so gab er im mit dem swerte .
0,1508 ainen slach der was maregroz .
0,1509 daz im z hovbet uur daz march scoz .
0,1510 da geschieth sich daz volcwic .
0,1511 sus saget uns maister albrich
0,1512 unt der guote phaffte lampret
0,1513 diz licht ist war unde rehth .
0,1514 hie duhte siv beidi div maz
0,1515 nu ist zith daz lazEN .